



食飯配話

細漢的時，跔厝裡逐日攏會聽著的一句話就是：「飯毋緊食食咧通去讀冊，閣跔遐咧食飯配話！」彼當陣，拄開始想講食飯敢毋是著愛配魚、配肉恰菜蔬遮的物配？配話欲哪食會落飯？以後才知影是咧叫咱食飯的時莫跔遐講話講袂煞，延時間。

去學校讀冊了後，中晝食便當的時，老師嘛定定叫人恬恬毋通講話，講食飯配話會妨害消化無健康。以後咱嘛才知影老師伊是驚學生因仔共伊吵著，毋但恰會妨害消化無啥關係，顛倒予學生因仔心情袂蓋好，食了歹消化。

到甲食頭路的時陣，公司的頭人，顛倒是逐禮拜都會叫幹部來食飯配話，閣號一个聽起來袂歹聽的名，號做午餐會報。以後阮嘛知影其實遐的頭人，是咧節省公司應該著愛支出的加班費，伊用一个幾十箍的便當錢，就共每一个員工中晝時點外鐘久的歇睏時間剝削去。

論真共想起來，咱有一寡流傳落來的俗語，並毋是攏真正確，親像講：「因仔人有耳無喙。」就是講大人若咧講話，叫因仔人莫插喙，講個毋捌代誌。這予真濟少年人失去真濟練習講話的機會。咱嘛有另外一句俗語講：「捷講喙會順，捷做手袂鈍。」敢毋是咧？以我個人的經驗，少年時陣小可較厚話淡薄仔，對以後佇社會上恰人咧行踏，顛倒是有加添袂少的機會。

國際上，有真濟較大場的活動，事前抑是事後攏著舉辦正式的宴會，毋但愛食飯配話，閣有袂少的規矩。親像飯前先啣「飯前酒」，繼落來宴會正式開始，食飯中閣有食魚配白酒、食肉啣紅酒的規矩。食飯飽了後閣著啣飯後酒恰啣咖啡。這整個的過程中，攏總著愛配話才會用得，咱就知影配話是佻爾仔重要咧。

咱人若規日攏總無話無句，久來定著加減會著憂鬱症。不時都悶悶不樂，活著敢袂誠無趣味？所以絕大多數的人，攏會加入真濟的團體。親像啥物同鄉會、同年會、同樂會、月會、食會恰真濟全國性抑是國際性的社會團體。內面所有重要的幹部，佻一位毋是口才一流的。口才佇生理場真重要通人都知，閣較重要的是佇國際上的談判，成功抑是失敗，敢無影響著一个國家全國人民的生活？

按呢咱就會當了解口才的重要啦！口才的訓練愈早開始愈好。人講：「講話中人聽較贏大細聲。」講話若中人聽，談判嘛較會贏。對這馬開始，咱就毋通閣再講「因仔人有耳無喙」抑是「毋通食飯配話」矣！

作者：陳憲國

☆詞彙學習☆

【食飯配話】tsiàh-pṅ-phuè-uē：以說話當下飯菜。喻邊吃飯邊說話。

【物配】mih-phuè：配菜，吃飯時的下飯菜。

【延】tshiàn：拖延、延誤。

【菜蔬】tshài-se：蔬菜。

【講袂煞】kóng bē suah：說個不停。

【頭人】thâu-lâng：首領、領袖。一般指團

體之負責人。

【白酒】pèh-tsiú：指白葡萄酒。

【紅酒】âng-tsiú：指紅葡萄酒。

【無話無句】bô-uē-bô-kù：默默無語之意。

【中人聽】tìng-lâng-thiann：使聽者聽起來很順耳。